

प्रसार भारती  
प्रादेशिक समाचार एकांश  
आकाशवाणी रायपुर (छत्तीसगढ़)  
18.45 सोमवार दिनांक 22.06.2026

प्रमुख समाचार –

- मुख्यमंत्री ह आज रईपुर के रेलवे स्टेशन ले सोमनाथ ज्योर्तिलिंग बर बिसेस ट्रेन ल हरा झंडा दिखाके सोमनाथ स्वाभिमान सांस्कृतिक यात्रा के सुरुआत करीन।
- दुर्ग पुलिस ह ऑनलाइन जुआ-सट्टा अउ म्यूल अकाउंट चलइया अंतर्राज्यीय गिरोह के खुलासा करे हे।
- छत्तीसगढ़ म आज मानसून के दस्तक- मौसम विभाग ह दंतेवाड़ा जिला ले दक्षिण-पश्चिम मानसून के प्रवेश के पुष्टि करे हे।

सोमनाथ स्वाभिमान सांस्कृतिक यात्रा

मुख्यमंत्री विष्णुदेव साय ह आज राजधानी रईपुर के रेलवे स्टेशन ले सोमनाथ ज्योर्तिलिंग बर बिसेस ट्रेन ल हरा झंडा दिखाके सोमनाथ स्वाभिमान सांस्कृतिक यात्रा के सुरुआत करीन। ए मउका म श्री साय ह किहीन कि सोमनाथ मंदिर हमर राष्ट्रीय स्वाभिमान, सांस्कृतिक गौरव अउ आस्था के प्रमुख केंद्र हे। सोमनाथ मंदिर ल कतकोन घांव विदेसी मन ह तोड़िन, फेर हर घांव मंदिर ल बना ले गीस, एहा देसवासी मनके अटूट आस्था के परिणाम हे।

संस्कृति मंत्री राजेश अग्रवाल ह किहीन कि सोमनाथ धाम के ए यात्रा श्रद्धालू मन ल सिरिफ आधात्यमिक अनुभूति भर नइ देही, एखर अलावा भारत के महान सांस्कृतिक परंपरा अउ राष्ट्रीय गौरव ल जाने के मउका घलो दिही।

सोमनाथ स्वाभिमान सांस्कृतिक यात्रा के तहत बिसेस ट्रेन ले प्रदेस ले सोमनाथ बर एक हजार ले जादा विशिष्ट लोगन, पद्मश्री, राज्य अउ राष्ट्रीय सम्मान ले सम्मानित कलाकार अउ साहित्यकार मन खाना होइन्। यात्रा म सामिल श्रध्दालु मन ह छत्तीसगढ़ के शिव मंदिर मनके पावन भूमि के माटी कलश अउ पवित्र नदी के जल कलश बाबा सोमनाथ ल अर्पित करही।

### प्रधानमंत्री-आभार

प्रधानमंत्री नरेंद्र मोदी ह अंतर्राष्ट्रीय योग दिवस ल वैश्विक उत्सव बनाय बर दुनियाभर के लोगन बर अपन आभार जतइन् हे। सोसल मीडिया पोस्ट म प्रधानमंत्री ह किहीन हे कि ए देख के खुसी होथे कि योग, सबो क्षेत्र अउ आने-आने देस के लोगन ल स्वस्थ जीवन के एक संघरा खोज म एकजुट करत हे।

उहें, अंतर्राष्ट्रीय योग दिवस के मउका म काली बीजापुर जिला म करेगुट्टा पहाड़ी म घलो सुरक्षाबल के अधिकारी अउ जवान मन ह सामूहिक योगाभ्यास करीन्। ब्लैक फॉरेस्ट के नाव ले प्रसिध्द पांच हजार फीट ऊंचा ए पहाड़ी ह कभू माओवादी मनके सबले सुरक्षित गढ़ रिहीस, फेर पाछू बछर ऑपरेशन ब्लैक फॉरेस्ट के तहत सुरक्षाबल के टीम ह माओवादी मनके ए गढ़ ल ध्वस्त कर दे रिहीस अउ तलासी अभियान म इहा ले भारी मात्रा म हथियार अउ साढ़े चार सौ ले जादा आईईडी बरामद करे गे रिहीस।

### ग्राम सभा

प्रधानमंत्री आवास योजना-ग्रामीण के आवास प्लस टू प्वाइंट ओ सर्वे के आखिरी प्राथमिकता सूची बनाय बर चौबीस जून के राज्य के ग्यारा हजार छै सौ ले जादा ग्राम पंचायत म ग्रामसभा के आयोजन करे जाही। ए ग्राम सभा म आवास योजना बर सर्वेक्षण के आधार म तैयार सूची ल सार्वजनिक रूप ले पढ़के सुनाय जाही। यदि कोनो पात्र हितग्राही के नाव सूची म नइ आही या कोनो प्रकार के कमी दिखही त ग्रामीण मन ह ग्रामसभा म दावा अउ आपत्ति पेस कर सकही।

### प्रधानमंत्री-बारह साल

प्रधानमंत्री नरेंद्र मोदी के अगुवाई में केंद्र सरकार के बारह बछर पूरा होयें मउका में नारायणपुर जिला में अबूझमाड़ क्षेत्र के ओरछा में जन कल्याणकारी योजना के फायदा लोगन तक पहुंचाय बर तीन दिवसीय सिविर लगाय गीस। “विस्वास के, विकास के, जन कल्याण के” अभियान में लगे ए सिविर में प्रशासन ल मिले तीन सौ छियानवे आवेदन में दू सौ सतहत्तर मामला के मउकाच में निपटारा करे गीस।

### अवैध खनन कार्रवाई

राज्य में खनिज संसाधन के संरक्षण, नियम के अनुसार ओखर उपयोग अउ अवैध गतिविधि उपर रोक लगाय बर सरलगत कार्रवाई करे जात हे। ए कड़ी में केंद्रीय खनिज उड़नदस्ता के संघरा टीम ह सिकायत के आधार में काली अउ आज आने-आने जिला में औचक निरीक्षण करके जांच अभियान चलाइस। ए दउरान बलौदाबाजार के खपरीडीह में चूना पत्थर के भंडारण स्थल अउ खदान में अनियमितता पाय जाय में छै ठन क्रशर इकाई ल सील बंद करके उंहा के संचालक मन ल नोटिस जारी करे गीस। अइसने, सारंगढ़-बिलाईगढ़ के ग्राम दहिदा में महानदी क्षेत्र में अवैध रूप ले रेत खनन करइया मसीन ल जब्त करके सील बंद कर दे गीस।

एखर अलावा मनेन्द्रगढ़-चिरमिरी-भरतपुर जिला के दंडाहस्वाही में केवाई नदी, पसौरी, कुटरा अउ हसदेव नदी क्षेत्र के अवैध रूप ले रेत उत्खनन करइया मन ल कारण बताओ नोटिस जारी करे गेहे।

### आईएसआई युवक-गिरफ्तार

जांजगीर-चांपा जिला के अकलतरा पुलिस ह आतंकी संगठन-आईएसआई के संपर्क में होय के आरोप में एक इन युवक ल गिरफ्तार करे हे। पंजाब निवासी सेवक सिंह उपर आरोप हे कि ओहा अकलतरा में रहिके ठेकेदारी के काम के आड़ में मोबाइल के माध्यम ले गोपनीय जानकारी विदेस भेजत रिहीस, जांच में ओखर संपर्क पाकिस्तान, सउदीअरब अउ मैक्सिको ले जुड़े होय के बात आगू आय हे। पुलिस ह ओखर मोबाइल जब्त करके जांच बर साइबर सेल ल भेज देहे।

### म्यूल अकाउंट-गिरफ्तार

दुर्ग पुलिस ह ऑनलाइन जुआ-सट्टा अउ म्यूल अकाउंट चलइया अंतर्राज्यीय गिरोह के खुलासा करे हे। ए मामला म तीन झन आरोपी मन ल गिरफ्तार करे गेहे। आरोपी मन तीर ले इक्यासी ठन एटीएम कार्ड, बांसठ ठो बैंक पासबुक, पांच ठन चेकबुक, तेरह मोबाइल, ग्यारा सिमकार्ड, एक ठन लैपटॉप अउ हार्ड डिस्क संघरा करीबन ढाई लाख रुपिया मूल्य के समान जब्त करे गेहे। पुलिस ल सूचना मिले रिहीस कि आईटीआई खेल मैदान तीर कोनो युवक मन ल ह लैपटॉप अउ मोबाइल के माध्यम ले ऑनलाइन जुआ-सट्टा चलावत हे। सूचना के आधार म पुलिस ह घेराबंदी करके आरोपी मन ल गिरफ्तार करीस। पूछताछ म आरोपी मन ह ऑनलाइन सट्टा खेलाय के अउ एखर बर आर्थिक रूप ले कमजोर लोगन के नाव ले म्यूल खाता खोलवाय के बात ल कुबूलिन।

पुलिस ह लोगन ल अपील करे हे कि ओमन ह कोनो भी मनखे ल अपन बैंक खाता, एटीएम कार्ड, पासबुक, चेकबुक या सिमकार्ड उपयोग करे बर झन देवय, काबर कि अइसन दस्तावेज के उपयोग साइबर अपराध, ऑनलाइन सट्टा, वित्तीय धोखाधड़ी अउ मनी लॉन्ड्रिंग जइसन अवैध काम बर करे जा सकत हे।

### “पेंशन संवाद”

संयुक्त संचार लेखा नियंत्रक कार्यालय रईपुर म काली तेईस जून के “पेंशन संवाद” के आयोजन करे जाही। ए कारीकरम बिसेस रूप ले ओ पेंसन भोगी मन बर हे, जउन मन ह संयुक्त संचार लेखा नियंत्रक कार्यालय के छत्तीसगढ़ सर्कल ले अपन पेंसन पावत हे। ए दउरान पेंसनर मनके समस्या के निपटारा करे जाही अउ उंखर सुझाव सुने जाही।

### गन्ना राशि-भुगतान

कबीरधाम जिला के भोरमदेव सहकारी शक्कर कारखाना ह सरलगत दूसर बछर जून महिनाच म किसान मन ल समर्थन मूल्य अउ उपराहा राशि के भुगतान करके देस के सहकारी शक्कर उद्योग म नवा कीर्तिमान बनाय

हे। कवर्धा म काली होय एक ठन कारीकरम म उप मुख्यमंत्री विजय शर्मा ह उनतीस करोड़ तिरालीस लाख रुपिया ल सीधा किसान मनके बैंक खाता म भेजिन।

### ढोलकल ट्रैकिंग रूट

वन अउ जलवायु परिवर्तन मंत्री केदार कश्यप ह दंतेवाड़ा जिला म ढोलकल ट्रैकिंग रूट के लोकार्पण करीन। जिला खनिज संस्थान न्यास के तहत करीबन इकसठ लाख रुपिया के लागत ले एला बनाय गे हवय। आसा जताय जावत हे कि ए रद्दा के सुरु होय ले क्षेत्र म साहसिक पर्यटन ल बढ़ावा मिलही अउ स्थानीय युवा मन ल रोजगार के नवा मउका मिलही।

### स्केटिंग चैंपियनशिप

कलकत्ता म होय ऑल इंडिया ओपन स्पीड स्केटिंग चैंपियनशिप म छत्तीसगढ़ के स्कैटर मन ह सुधर प्रदर्शन करत पंद्रह ले जादा पदक जीते हवय। एमा बिसेस रूप ले भिलाई ले चुने गे सबो आठ खिलाड़ी मन ह पदक हासिल करीन हे। देसभर के चार सौ ले जादा खिलाड़ी मनके ए प्रतियोगिता म होय सानदार प्रदर्शन बर खेल संगठन अउ खेल प्रेमी मन ह खुसी जतइन हे।

### मौसम

छत्तीसगढ़ म आज मानसून ह दस्तक दे देहे। मौसम विभाग ह दंतेवाड़ा जिला ले प्रदेस म दक्षिण-पश्चिम मानसून के प्रवेस के पुष्टि करे हे। मौसम विज्ञानी डॉक्टर गायत्री वाणी ह आकाशवाणी समाचार ले बात करत अवइया चौबीस ले अड़तालीस घंटा के दउरान राज्य के कतकोन हिस्सा म बरसा के गतिविधि बाढ़े के संभावना जताय हे।

### संक्षिप्त समाचार

- छत्तीसगढ़ म अनुसूचित जाति, अनुसूचित जनजाति अउ अन्य पिछड़ा वर्ग के विद्यार्थी मन ह शिक्षा सत्र दू हजार छब्बीस-सत्ताईस के पोस्ट मैट्रिक छात्रवृत्ति के नवीनीकरण बर तीन जून तक ऑनलाइन आवेदन कर सकत हे ।
- कोरबा सक्ति मुख्य मार्ग म ट्रैक्टर के टक्कर ले दुपहिया म बइठे एक इन युवक के मउकाच म मउत हगे ।

